

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 72 (1987)
Heft: 28

Vorwort: Remarcas redacziunalas

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Remarcas redacziunalas

Cun las poesias «Dus plaids per Tei sin viadi» vegn il lectur envidaus alla lectura dil Ischi semestril nr. 28. L'autura da quellas poesias, *Paula Vincenz*, ei naschida igl onn 1968 a Breil. Ella ha absolviu in emprendissadi d'uras e bischutaria a Glion. Gia dapi zacons onns ha ella entschiet a far emprovas da scriver poesias. Cun quellas vul Paula Vincenz «far paratgs sur dil mund, exprimer sentiments, descriver e malegiar cun plaids». E sco ils exempels en quest Ischi semestril muossan reussescha quei gia detg bein ad ella.

Theodor Gartner (1843–1925), in enconuscent linguist austriac, ei sefatschentaus da rudien cul lungatg romontsch. Pliras gadas eis el viagiatus tras il Grischun romontsch ed ha fatg registraziuns ni esploraziuns linguisticas, ch'el ha silsunter publicau en siu cudisch «Viaggi ladini». Gartner ha era scret ina grammatica retoromontscha. A quei linguist e surtut a ses studis pertuccont il romontsch el Grischun dedichescha pader dr. *Ambros Widmer*, Mustér, siu artechel egl Ischi semestril.

Igl onn 1811 ha ei dau in grond barschament a Surrein. *Martin Mathiuet*, Surrein/Trin, emprova da reconstruir quei trest eveniment sin fundament dad in document dil cumin dalla Cadi che datescha dils 9 da settember da 1811.

Sora *Florentina Camartin*, Mustér, dilucidescha en in extendiu artechel «Entgins aspects davart la scoletta e sia muntada». En sia lavur presenta ella oravontut duas persunalitads ch'han giu gronda impurtonza per l'educaziun e scolaziun dils affons che van aunc buc a scola, numnadamein Friedrich Fröbel e Maria Montessori. Ad in excuors historic davart genesa e svilup dall'instituziun «scoletta» lai sora Florentina suandar diversas constataziuns che pertuccan la muntada pedagogica e culturala dalla lavur en scoletta.

En quest numer publichescha sur *Sep Fidel Sievi*, plevon a Mustér, la secunda part da sia lavur davart «Gruppaziuns e cuminonzas religiusas». Igl emprem emprova el da sclarir la noziun «secta», silsunter presenta el duas da quellas gruppaziuns, ils Adventists ed ils Mormons.

Era sur dr. *Giosch Albrecht*, Rueun/Cuera, publichescha la secunda part da siu artechel «La megliera part», nua ch'el continuescha cun sias reflexiuns davart il meditar en nos dis. En quella part dominescha la pratica. Igl autur fa allusiun a fuormas e vias meditative sco scalem preparatoric e presenta silsunter exerchezis da detensiun che dueien gidar a deliberrar da bloccadas.

Electroinschignier e lic. oec. *Claudio Casanova*, Cuera, explichescha als lecturs digl Ischi semestril «La logistica – ina disciplina economica meins enconuschenta». Logistica circumscriba el culs plaids: «Patertgar ed elaborar da maniera ponderada, quintar cun sistem, prendend en mira la totalitad per eruir ed organisar spazi e temps per il moviment da rauba ed informaziuns sin basa da concepts strategics.» En siu artechel sefatschenta Casanova cun la logistica sco sistem, cun sia funcziun, sias applicaziuns, ses cuosts eav.

Davart il curriu e passau dils davos meins en Surselva rapporta la Cronica dad *Ignaz Cathomen*, e la gliesta da Litteratura sursilvana, cumpilada da *Norbert Berther*, concluda puspei quei numer. Il proxim numer cumpara pér il mars 1988, sco davos Ischi semestril. Naven da 1989 vegn la ROMANIA puspei ad edir in Ischi annual.